



Visoki predstavnik/EU specijalni predstavnik apelira da predsjedništvo preuzme inicijativu u formiranja vlasti

Visoki predstavnik i specijalni predstavnik EU Christian Schwarz-Schilling sastao se danas sa tri člana kolektivnog Predsjedništva Bosne i Hercegovine.

Gospodin Schwarz-Schilling je ovu priliku iskoristio da čestita Predsjedništvu na prijemu Bosne i Hercegovine u NATO program Partnerstvo za mir, informisao Predsjedništvo o posljednjem sastanku Vijeća za implementaciju mira u Briselu, te razgovarao o formiranju vlade.

Što se tiče članstva u Partnerstvu za mir, visoki predstavnik i specijalni predstavnik EU je jasno istaknuo da, ukoliko Bosna i Hercegovina želi dodatno unaprijediti odnose sa NATO savezom te na koncu pridružiti se Alijansi kao članica, biće neophodna puna implementacija dogovorenih reformi u sektoru odbrane i saradnja sa Međunarodnim krivičnim tribunalom u Hagu.

U vezi sa sastankom političkih direktora Vijeća za implementaciju mira u Briselu, visoki predstavnik i specijalni predstavnik EU je naglasio značaj svih reformi, a posebno restrukturiranja policije, koje su neophodne za zaključenje sporazuma o stabilizaciji i pridruživanju sa Evropskom unijom, kao i pitanje fiskalne održivosti i uspostavljanja funkcionalne države.

U pogledu tranzicije OHR-a u Ured specijalnog predstavnika EU, gospodin Schwarz-Schilling skrenuo je pažnju na činjenicu da su politički direktori izrazili određenu zabrinutost u vezi sa nekim pitanjima, da će s velikom pažnjom pratiti i ocijeniti situaciju, te da će odluku o zatvaranju OHR-a ponovo razmotriti i potvrditi u februaru.

U vezi sa pitanjem formiranja nove vlade, gospodin Schwarz-Schilling je jasno naglasio da je neprihvatljiva činjenica da vlada na državnom nivou još uvijek nije formirana. On je također tražio od Predsjedništva, kao jedine institucije na državnom nivou koja funkcionira, da pokrene inicijativu da okupi političke stranke kako bi se stvorile koalicije i formirala vlada.